

AIZAWL MUNICIPAL AREA CHHUNGA SA LEH THLAI MAN NI
28.05.2021(Zirtawpni)-a ENFIAH CHUNGCHANG

Committee on Fixation of Meat, Vegetable and Fruit chuan ni 27.05.2021(Nilaitawhtan)-a Deputy Commissioner, Aizawl District Office Chamber-ah thurel angin ni 28.05.2021(Zirtawpni) khan Aizawl Municipal Area chhunga sa leh thlai sawrkarin a bithliah angin a zuartuten an zuar em tih enfiah tur leh thilzuarthe leh leitute indawr tawn dan chungchang zirchiang turin bazaar hrang hrang heng Bawngkawn, Chanmari, Dawrpui leh Kulikawn bazaar te an tlawh a. Ni 28.05.2021 zing dar 7:30 AM bazaar te hi tlawh tan a ni.

Committee hi Bawngkawn bazaarah kal hmasa berin sa leh thlai zuartuten a man an bithliah dan te an la khawm a. Chung an lakkhawmte chu Annexure I-a tarlan ang hi a ni.

Thil man an lakkhawm atanga a lan danin thlai zuartu tam zawk chuan an thil zawrhte hi sawrkarin a man tur a bithliah aia sang zawkin an zuar deuh vek tih a hmuchhuak a. Thil zawrh tam takah chuan sawrkarin a pawmpui bukna leh tehkhawng hman a ni lo. Thil zuartute chuan Wholesale-a laknaah sawrkar pawmpui bukna leh tehkhawng hman a ni lo tih an sawi a, hei hian thil leitute hnena an hralh chhuah lehnaah nghawng a neih phah niin an sawi. Bawngkawn bazaarah hian bazaar dangte aiin thlai lei tur chi hrang hrang a tam zawk a, thil leitute pawhin duhthlan tur bazaar dang aiin an nei tam zawk a ni.

Chumaibakah sa leh thlai zuartute hi Commerce & Industries Department enkawl bazaar building chhungah an in zuar a, thil zuartute hi an thathnem em avangin a chhung a tawt hle mai a, bazaar leh a chhehvelah hian inkarhlat deuhin a awm theih loh a ni ber, hei hi Aizawl Municipal Area chhunga hri a len nasat lai chuan thil pawitak a ni.

Bawngkawn bazaar an tlawh zawh hian, Committee chuan Chanmari bazaar an tlawh leh nghal a. Hetah hian Chanmari Local Level Task Force te rauhmanna angin kawngpui dungah thlai zuartute hi an in pho a.

Bawngkawn bazaar aain Chanmari bazaarah hian thil zuar an tlem zawk bakah kawngpui dunga thut dan tur fel taka ruahman a nih avangin thil zuartute leh leitute inkarhlat deuhin an awm theih phah a ni.

In chhunga thil zawrh aain hmun ualau leh thawvenga thil zawrh hi hripui len lai pheii chuan a him zawk fe niin a hriat. Chanmari bazaar thil zawrhthe leh a man bithliah dan chu Annexure II-a tarlan ang hi a ni.

Sawrkar man bithliah leh thilzuartute man bithliah dan enin Chanmari bazaara thil zuartute chuan thil an titlawm zawk a, Bawngkawn bazaar thilte hi chu a to zawk zel niin a lang. Chumaibakah sawrkarin man a bituk aia hniama thil zawrh hi Bawngkawn bazaar aain Chanmari bazaarah a tam zawk a ni. Arsa leh Bawngsa te pawh a man sawrkarin a bithliah ang chiaha zawrh an ni. Amaherawhchu, Chanmari bazaarah hian Bawngkawn bazaar aain thlai zawrh a tlem zawk a ni.

Dawrpui Veng huamchhungah Containment Zone puan a nih avangin veng dang ai chuan sa leh thlai zuartute an tlem zawk niin a lang. Commerce & Industries Department bazaar building chu Containment area chhunga awm a nih avangin thil zuar pawh hi an tlem phah niin a lang. Thlai zuartute chu Zion Street kawngpui chhukthlaah an inpho a, inkharkhip hmaa thil zawrh ai chuan inkharkhip laia an thil zawrhthe hi a tlem zawk fe a, an thil zawrh hrim hrim pawh hi hun dang ai chuan a chhe deuh zawk a ni. Dawrpui bazaar thil man bithliah dan chu Annexure III-a tarlan ang hi a ni.

Dawrpui bazaara thil man lakkhawm hi bazaar dinhmun dik tak hre turin a tlem lutuk mah mah deuh a. Amaherawhchu, thil man lakkhawmte beitham hle mah se Chanmari leh Bawngkawn bazaar ai chuan thil man a tlawm zawk tih a lang. Chutih mek laiin Dawrpui bazaarah hian Chanmari leh Bawngkawn bazaar aain thil awmzat a tlem zawk mai bakah a chi hrang hrang pawh hi a tlem zawk a. Hetah pawh hian thil zawrh thenkhatah a zuartute hian sawrkar pawmpui bukna leh tehna an hmang lo a ni. An sawi dan chuan wholesale-a petu ten bukna an hman loh avangin an hralh chhuah leh dan pawh a nghawng lo thei lo tih a ni.

Kulikawn Bazaar pawh hemi ni hian tlawh tel a ni a, Ngaizel pan pheina kawngpui dungah thil zuartute hi an thu a. An thlai man lakkhawm chu Annexure IV-a tarlan ang hi a ni. Kulikawn bazaara thil zawrhte hi hmun dang ami te nen a inang deuh tlangpui a. Thlai man lakkhawm hi a beitham deuh avangin bazaar dinhmun dik tak sawifiah a tiharsa a ni.

Committee-in Aizawl Municipal Area huam chhunga bazaar hrang hrang a tlawh kual hnuah a hnuai tarlan ang hi thil awm dan chu a ni:

- (i) A tlangpui thuin thlai zuartute hian sawrkar in rate a bituk aia sang a zuar leh rate a bituk aia hniam a zuar an awm.
- (ii) Thil zuartu ten bukna an ngai pawimawh hle.
- (iii) Thlai man sang lutuk tur khuahkhirh tak tak dawn chuan sawrkarin a pawmpui tehkhawng/bukna hman ngai mah se bazaar thil zawrh tam zawkah hian chutiang bukna chu hman a ni lo.
- (iv) Thil zawrh te hi inkharkhipna kalpui hma aiin a tlem zawk.
- (v) Inkharkhipna kalpui hma aiin thlai zawrhte hi an chhe zawk tlangpui bawk.
- (vi) All Mizoram Poultry Farmers' Association (AMPFA) ten arsa man bithliah chu dodal mah se arsa zuar endikte hian sawrkar bithliah angin a zuar tih hmuhchhuah a ni a. Hei hi arsa zuartu ten sawrkar an tawiawmna tha tak a ni.
- (vii) Aizawl Municipal Area chhunga bazaar hrang hrang tlawh kual thil lang chiang tak chu tun ang hripui len hun lai chuan mipui chen tamna hmun nena inkarhlat taka Bazaar leh a chhehvel zau tha tak neih hi a pawimawh hle tih hi.
- (viii) Thlai thartute, a hlawma thil zuartute leh dawrtu mipui hrim hrim pawh hi sawrkar pawmpui bukna/tehkhawng hman pawimawhna leh thlai leh sa man bithliah te inzirtir hi kan la ngai hle tih a hriat a. He inzirtirna atan hian chanchinbu leh Electronic Media hman tangkai a tha ang.

(ix) Aizawl bazaara sa leh thlai zuartute leh a dawrtu mipuite nunphung thuk zawka zirchianna nei tur chuan Ward In-charge te hi thlai leh sa man kartin lakhawm tura hriattir ni sela, tin, mipuiin eng thilte nge an lei tam bik deuh tihte pawh a lakhawm dan tur ruahman sa thlap hmanga tihtir a tul ang.

He joint visit a member kalte chu Annexure ah dah a ni.




(Dr.LALHRIATZUALI RALTE, IAS)

Chairman,
Committee on Fixation of
Price of Meat, Vegetable & Fruit
&
Deputy Commissioner,
Aizawl District

Memo No.F.13011/1/2021-COMFIX : Dated Aizawl, the __June, 2021

Copy to:

- 1.P.S to Hon'ble Minister, Commerce & Industries Deptt
- 2.All members concerned for information.
- 3.Guard file No.55



(H.D.LALRINTLUANGA)
Member Secretary,
Committee on Fixation of
Price of Meat, Vegetable & Fruit
&
Additional Director,
Commerce & Industries Deptt